

庚辰穀雨前一日以爲

靜丞仁兄大人四句誕辰誌慶

陳寶鋹

弟關維恭拜贈

孟昭鼐

曾文正公全集

第三函
六冊

曾文正公書札卷五

本

與朱堯階

在縣城招水手約四千人內舵工須另行造冊頭工亦另行

造冊

一船工須四百人內正舵工一百三十人副舵工二百七十人
頭工須三百人餘皆善於盪槳者其口糧銀兩盪槳者每日一
錢頭工一錢一分副舵工一錢二分正舵工一錢三分此外皆
一錢

一水師分十營前營二

正前營正紅旗副前營廂紅旗

左營二右營二後營二

中營二每營共五百人

一每營分快船四隻釣鉤船十二隻其五百人分派各船之法營制中已詳之矣

一招定水手遣二千人至衡州每人給途費錢三百文遣二千人至湘潭內分一千交褚太守夏明府二人分一千交胡維峰胡楚峰二人褚夏善教水戰而恐不能馴服湘鄉之水手二胡熟習湘鄉之水手而恐於水戰事太生彼此互相爲用皆仗堯翁從中調停

一水手第一教坐而盪槳第二教放礮

一教成大概規模於二十二二十三將褚夏二胡之水師船攆至衡州途次卽用操演之法

覆駱甯門中丞

武昌漢陽又搬遷大半該匪又有上竄之意侍本迫於星火擬定正月二十八九起行無論船礮之齊與不齊勢難再延耳朱石樵書言彭澤一帶賊遂記籍編冊將丁吾之丁而田吾之田真堪痛哭甄師自出省後遂無來書不知有信達尊處否甄師實賢者又無意氣乃不見信於人理不可解前奉來示言省局所存之礮可以撥用百尊望卽飭塔將點出日內當送湘潭船上操演如粵礮到六百尊則此項礮位仍畱省城不輕帶出侍去年札塔將查稟至今尙未稟復也日內大雨不止船廠不能興工焦灼萬狀不知諸事何以不順若此假令事事順手而以

侍之豪無閱歷又忠信不足孚於僚屬固已知其無能爲矣况又不順若此乎起行一月口糧總須八萬金務求閣下與君兄爲我設籌此閒所截各餉及各捐項可發正月及二月上半月口糧如本月捐項不踴躍則二月初閒水陸各勇之糧尙須由省支取斯更難耳

與陳俊臣

自別以後日盼足下來音而久不見達足下深明武事於御眾之道蓋得古人之遺意僕此次東行博求吾鄉血性男子有忠義而兼嫻韜略者與之俱出足下於僕有文字之緣有知己之雅豈可不聯鑣以偕茲專人前往乞足下稟告侍聞卽日來衡

陽共籌諸務正月之季定期長征書不詳盡伫盼麾從

覆徐君青

弟歸舍小住數日緣遠征在即咫尺庭闈不一叩別則非人情而此間諸色人亦多有回里度歲者遂令各事不得急就入春以來又苦雨雪船廠不能趕辦以是焦慮然鄙意決於正月底成行尚有數事與閣下敬商者臚列於左

一今年省局製造火藥似竟不可停工蓋水師費子藥最多而鄂省勢難寬備必須本省接濟除前單取用數目外尚祈飭局添造以便陸續運送

一起行口糧去冬奉尊處書言須七萬頃寄中丞書言須八萬

皆約略一月之需細思出征一月必在黃州一帶頓兵堅城之下第二月如何接濟真乃不堪設想湘省司庫出入規模弟不甚詳晰尊兄爲我籌畫以後每月能接濟二三萬金否研生書來道兄爲此事甚焦灼弟亦極知其難然舍我本省他處更難爲將伯之呼耳

一各省協濟之說鄙意實恐無相應者憩亭兄屢勸致書各處弟非憚於一紙書特枉勞耳目下較完富者以廣東四川爲最江西次之鄙意必在黃州巴河等處稍立功績乃可奏明求協於廣東必師至湖口以下乃可求協於江西惟一到鄂城即可求協於四川此亦視乎聲績以爲次第非可執途人而求振飢

也吾兄宦蜀有年度其情勢能稍仗楚軍否彼中大吏有與閣下交契者能以乞糴之書痛陳秦庭否胡煦堂觀察與弟同鄉交好弟思爲書懇求不知近何以出缺祈示知

一憩亭兄復書不能總辦糧台止能奏辦捐輸則糧台尙乏明練之員又水軍亦須設一提調鄙意思用郴州鄒牧敬求閣下爲我設法能於上四屬調一人急署郴篆該牧能速來則感謝無旣此外需員尙多其無缺者俟到省再商

以上數條務求逐一賜復更有弟所不及慮者尙祈隨時指示不勝感禱

復楮一帆

一三板艇蘭坡太守言止須每船十千弟決其必無是理昨書
言造七十號價在千串者已作十四千計矣頃蘭坡兄書言須
四十千則與前說懸遠即可不必造八十號之多不特經費無
出且船多則須勇更多實不足以敷分配况衡郡現已造三板
艇三十號潭廠所造至多不得過五十號兩廠仍合成八十號
一快蟹每船配五十人長龍配廿五人八號共配三百人
一釣鉤船百廿號於中擇其靈便而堅實者五十號以作戰船
凡十營每營配五號共配百人其餘七十號則以作輜重船
一水師十營常以八營同行打仗以兩營在後守護輜重糧台
其輜重船上亦有礮械

一閣下及夏君既願帶楚勇則請各帶一營

閣下正中營正黃旗夏君副中營廂

黃旗

各管四百人此閒以成守備爲正前營陳令

鑑源潮州人

爲副前

營其左二營右二營俱在衡廠中二營後二營俱在潭廠

後二營卽

用以守護糧台者也

一在潭買船之胡維峰係買賣場中人而有義俠之氣心地明

白操守廉潔求之吾輩亦不多得僕甚重之卽用之爲正後營

營官又用其族兄弟胡楚峰爲副後營營官守護糧台必能得

力蓋鈞鉤船隻皆其所買辦湘鄉水手皆其所熟悉大江河道

皆其所習遊方今用人不拘資地想閣下必能青照也二胡與

朱堯階到潭時乞閣下與之商籌一切

一閣下熟於水戰事宜而於湘鄉水勇則言語不通情意不達
二胡熟於水勇之氣習而於舟師操演水次接仗則茫然不知
斯二者宜互相爲用閣下宜遣數人入二胡營中以教水戰而
申紀律又宜請堯階薦湘鄉數人入閣下營中以通言語而達
情意庶不至於扞格不入矣

一水手五千人除每營分配四百十營合四千外下餘千人爲
輜重七十號之用如嫌太少不敷駕駛再雇二三百亦可

一湘潭四營操演必須礮位擬由衡解廣礮百位至潭十六七
可到再由省解熟鐵礮百尊至潭如有不敷俟全軍抵潭時再
行分配

一湘潭四營應分快蟹船十六號卽由衡撥六號送潭於十二

三解去其長龍船應由潭撥衡者卽不必送來矣

一旗幟每船各尾旗五道五色各桅尖旗一道分別正紅廂白營官

旗大旗一道七星旗一道湘潭四營之旗均在此閒製就十二

三送去此外調隊之旗則聽各營官自製

一所買鈞鈎船百二十號已送至衡者四十餘號此後不必再

送來衡

一每船艙長一名卽尊書所謂坐艙頭目也正舵一名副舵二名卽所謂幫舵護舵也

頭工二名卽所謂大桅二桅也此六人口糧較優餘俱以水手呼之口糧

一例免致紛歧

以上各條仍祈逐一示復或專差限二日送到更妙

覆朱堯階

一此閒水師六營須二千四百人外剩釣鉤輜重船二十號須用三百人駕使目前已有千六百人再添一千人即可成軍湘潭四營須一千六百人外剩釣鉤五十號須用八百人駕使須盡由兄與胡君雇募

一戰船載物不宜太多此萬不可易之理茲定每營大船十三號使蟹四長龍四釣鉤五共載米百石煤千石火藥六千觔子一萬觔方爲合式太少則飄輕不能壓浪亦不可也

一輜重船除自買七十號外更須另雇三十號合成百號方敷

使用大約以三十號裝米二十號裝煤三號裝火藥四號裝子彈二號裝鹽三號裝油其餘三十幾號以裝雜項及分坐各委員

一湘潭整船不知近日何如弟當再以信與菊農令其趕緊辦畢二十三四委員在湘潭河下收米庶有船可載并求兄與維峰加信去催

一趙玉班有用之才現有札往調求催其飛速來衡

以上數條祈一一查照辦理大局如此以後不更改矣

覆倉少平

弟在此閒籌辦無狀日夜焦灼而諸事彌不稱心平昔嘗人出

征遲滯或咎人軍興浪費及身膺斯責則其遲滯尤久而其浪
費更多履之後艱於茲益信各項船隻前限於燈節畢工因雨
雪連八九日又復愆期現定於月杪起行船之齊否礮之到否
不復顧計所提漕米閣下前書曾暢言裝帶不宜過多中丞及
憩亭兄筱泉亦詳言之弟不敢膠執已見擬酌帶萬餘石前赴
下游餘一萬數千石卽在省城覓倉存貯求閣下爲我擇一善
地各州縣皆欲早爲交清以了公事而省轆轤弟札中言交兌
之後卽由局派人看視不與該縣相干無使人疑或帶或不帶
有所厚薄左右於其間也將來由省續行運鄂之費經委員等
議以二米改收折色作爲水腳頃已照議行矣

覆朱石樵

岷樵奏調台端赴皖公義私情俱不可以不往弟擬月杪起行
在省耽閣數日花朝之前可以赴鄂旌從或與偕行亦未爲不
可特到鄂以後弟須水陸並進與此賊決戰於黃州巴河之間
閣下則可由黃陂麻田閒道赴廬弟欲聽閣下之自往則失吾
干城腹心之助欲攜閣下以偕行又負岷樵救焚拯溺之望以
是展轉難遽決爾假令天心厭亂鄂湘二省之師竟能克復黃
州驅逐巴河與岷樵及閣下之師會於湖口小孤之間併力而
攻安慶則大局猶有可爲蒼蒼者究竟未知何若吾輩竭力爲
之成敗不復計耳此閒所辦快船差強人意長龍船薄脆不

堪連日鬱惱異常弟前見成守備熟悉船事推心置腹委用極專不謂遽失所恃璞山不願從吾營制弟比與霞仙細商亦嫌其帳下幫手過少恐二千餘人者非一二人所能馴御且此時斷斷不合將來進止參差亦難得力弟卽決計不帶之東下方今世亂需才如璞山者弟卽不能用自有他人能用之者勉於求合乃所以愈離也

覆胡維峰

昨與楮太守一書言快蟹船配五十人長龍船配二十四人每營僅用釣鉤船五號等語此二日細看快蟹長龍實不能容許多人夜間無處安歇快蟹止能容四十人長龍止能容十六人